



Broj: 02-04-29617-50.1/24  
Sarajevo, 23.05.2024. godine

## IZMJENE I DOPUNE GODIŠNJEG PLANA PROVOĐENJA PROGRAMA RAZVOJA MALE PRIVREDE ZA 2024. GODINU

Na osnovu člana 10. stav (4) Zakona o poticaju razvoja male privrede („Službene novine Kantona Sarajevo“, broj: 29/15) i člana 2. stav (2) Pravilnika o postupcima u provođenju Programa razvoja male privrede („Službene novine Kantona Sarajevo“, broj: 20/21, 25/23, 47/23 i 16/24), u Godišnjem planu provođenja Programa razvoja male privrede za 2024. godinu („Službene novine Kantona Sarajevo“, broj: 19/24) (u daljnjem tekstu: Godišnji plan) vrše se sljedeće izmjene i dopune:

### I

U poglavlju 4. „Programi poticaja razvoja subjekata male privrede“, podtačka: „4.2.4 Program: Poticaj direktnih stranih ulaganja - Podrška za osnivanje pravnog lica čiji je osnivač strani ulagač“, mijenja se i glasi:

**„4.2.4 Program: Poticaj direktnih stranih ulaganja - Podrška za osnivanje pravnog lica čiji je osnivač strani ulagač**

#### **Pravo i uslovi za dodjelu poticajnih sredstava**

Pravo učešća na javnom pozivu po ovom programu ima strano pravno lice koje nema registrovano poslovanje u Bosni i Hercegovini, posluje minimalno dvije godine do dana 31.12.2023. godine, u finansijskim izvještajima za svaku od prethodne dvije godine ima prikazanu dobit, ispunjava uslove za svrstavanje u kategoriju subjekata male privrede kako je to propisano članom 3. Zakona i ima kvalitetnu biznis ideju koja je kroz proces cjelovitog biznis planiranja razvijena u perspektivan biznis model predočen u formi biznis plana.

Kompletna dokumentacija koju podnosioc prijave dostavlja uz prijavu na javni poziv po ovom programu mora biti prevedena na jedan od službenih jezika u Bosni i Hercegovini i ovjerena od strane ovlaštenog sudskog tumača. Bespovratna sredstva po ovom programu dodjeljuju se novosnovanom pravnom licu sa sjedištem na području Kantona Sarajevo koje ima većinski udio podnosioca prijave odabranog po ovom programu i koje je registrovano za obavljanje osnovne djelatnosti obuhvaćene podtačkom a) tačke 3.1 Opći uslov - obavljanje registrovane osnovne djelatnosti iz ovog Godišnjeg plana, osim djelatnosti koje podliježu restrikciji u smislu člana 3. Zakona o stranim ulaganjima Federacije BiH („Službene novine Federacije BiH“, br. 61/01, 50/03 i 77/15). Ovaj program bit će promovisan prema ciljnoj skupini putem svih dostupnih kanala promocije. Prilikom vršenja aktivnosti promocije poseban fokus bit će na fizičkim licima sa stalnim boravkom u inostranstvu koja imaju vezu sa Bosnom i Hercegovinom i direktan ili indirektan uticaj u stranim pravnim licima. Javni poziv po ovom programu bit će objavljen na web stranici Ministarstva na jednom od službenih jezika u Bosni i Hercegovini, engleskom jeziku i njemačkom jeziku.

## Namjena utroška poticajnih sredstava

Mala i srednja preduzeća predstavljaju okosnice ekonomija širom svijeta te mogu značajno doprinijeti prekograničnom ekonomskom rastu, inovacijama i otvaranju novih radnih mjesta. Međutim, na globalnom nivou, u razvojnim politikama nadležnih institucija potencijal malih i srednjih preduzeća kao stranih investitora obično je zanemaren. To potvrđuje i organizacija Konferencija Ujedinjenih nacija o trgovini i razvoju (UNCTAD) koja u studiji pod nazivom – „Promocija međunarodnih investicija malih i srednjih preduzeća“ (eng. „Promoting International Investment by Small and Medium-sized Enterprises“) navodi: „Iskustvo UNCTAD-a u radu sa institucijama nadležnim za investicije, kao što su agencije za promociju investicija pokazalo je da su institucije, politike i infrastruktura za privlačenje i promociju investicija uglavnom usmjereni na industrijske projekte velikih multinacionalnih preduzeća.“ Ipak podržavanje direktnih stranih investicija malih i srednjih preduzeća iz inostranstva ima pozitivne efekte na ekonomiju primaoca ovih investicija, što uključuje kreiranje novih radnih mjesta, novi priliv kapitala, prenos znanja i tehnologija, integraciju domaćih kompanija u globalne i regionalne lance vrijednosti, ali i angažman lokalnih dobavljača i partnera. Također, za razliku od velikih multinacionalnih preduzeća, manja je vjerovatnoća da će direktni strani investitori iz kategorije malih i srednjih preduzeća istisnuti lokalne kompanije sa domaćeg tržišta. Ministarstvo u ovom Godišnjem planu, cijeneći ove činjenice i raspoložive nadležnosti, planira provođenje ovog pojedinačnog programa kojim se daje podrška direktnim stranim investicijama malih i srednjih preduzeća iz inostranstva, odnosno podrška za osnivanje pravnih lica sa sjedištem na području Kantona Sarajevo koja imaju većinski udio stranog pravnog lica. Ova podrška će se dodjeljivati u obliku finansijskih sredstava za nabavku osnovnih sredstava, opreme, mašina, alata i tehnike (osim mobilnog telefona) koja nije starija od deset godina i koja je nabavljena od registrovanih poslovnih subjekata. Također, ovim programom obuhvaćeno je sufinansiranje digitalizacije poslovanja (što uključuje troškove izrade integralnog informacionog sistema, web hosting, business e-mail hosting, korporativne informativne web stranice, izradu webshop platformi, razvoj mobilnih aplikacija, i sl.) i sufinansiranje uvođenja sistema međunarodnih standarda i troškova certificiranja sistema i proizvoda (CE oznaka) i troškova sticanja prava ili obnavljanja upotrebe standarda: ISO, HACCAP, HALAL i drugih standarda kvalitete.

## Iznos poticajnih sredstava

Za provođenje aktivnosti po ovom programu predviđeno je 350.000,00 KM budžetskih sredstava. Predviđena je poticajna grant podrška po odabranom korisniku koja se u ovisnosti od ocjene prihvaćenog biznis plana, dodjeljuje u maksimalnom iznosu do 70.000,00 KM. Korisnik sredstava po ovom programu obavezan je, prije zaključenja ugovora o dodjeli poticajnih sredstava, dostaviti dvije bjanko ovjerene mjenice sa ovjerenim mjeničnim izjavama, koje se mogu realizirati do visine iznosa odobrenih ovih sredstava uvećanog za ugovorne kazne i zakonske zatezne kamate. Troškovi obezbjeđenja ove bjanko ovjerene mjenice padaju na teret korisnika sredstava.

## Uslovi i kriteriji za izbor korisnika poticajnih sredstava

Podnosilac prijave - strano pravno lice u I fazi mora ispunjavati sljedeće osnovne (eliminatorne) uslove kako bi njegova prijava bila uzeta u daljnje razmatranje: da je strano pravno lice koje nema registrovano poslovanje u Bosni i Hercegovini; da posluje minimalno dvije godine do dana 31.12.2023. godine; da u finansijskim izvještajima za svaku od prethodne dvije godine ima prikazanu dobit; da ispunjava uslove za svrstavanje u kategoriju subjekata male privrede shodno članu 3. Zakona; da ima kvalitetnu biznis ideju koja je kroz proces cjelovitog biznis planiranja razvijena u perspektivan biznis model predočen u formi biznis plana, koji obavezno uključuje ukupna sredstva za realizaciju poslovne ideje, sopstvena sredstva i poticajna grant sredstva iz budžeta; da u biznis planu nije predvidio korištenje poticajnih grant sredstava iz budžeta za neprihvatljive troškove definisane u javnom pozivu; da je dostavio kompletnu dokumentaciju koja se traži javnim pozivom i da je ova dokumentacija prevedena na jedan od službenih jezika u Bosni i Hercegovini i ovjerena od strane ovlaštenog sudskog tumača; da je spreman registrovati pravno lice sa sjedištem na području Kantona



Sarajevo u kojem ima većinski udio ukoliko bude odabran kao korisnik sredstava; da je spreman obezbijediti vlastito učešće u vrijednosti od 40% od ukupnog traženog iznosa poticajnih grant sredstava po ovom programu i da u predmetnu svrhu do dana podnošenja prijave na javni poziv nije koristio poticajna sredstva koja potiču iz drugih izvora.

Javnim pozivom bit će definirani ostali uslovi i kriteriji.

Svrha	Finansijska podrška za strane ulagače koji imaju namjeru da osnuju pravno lice sa sjedištem na području Kantona Sarajevo
Korisnici	Strani ulagači koji osnivaju pravno lice na području Kantona Sarajevo sa svojim većinskim udjelom
Nosilac aktivnosti	Ministarstvo privrede Kantona Sarajevo
Sunosioci aktivnosti	Institucije koje obezbijede dodatna sredstva ili tehničku podršku za provođenje ovog programa mogu biti sunosioci aktivnosti
Način provođenja	Javni poziv
Aktivnosti	Promocija programa putem kanala komunikacije kojima raspolaže Ministarstvo privrede Kantona Sarajevo, uz saradnju sa Uredom za dijasporu Vlade Kantona Sarajevo, Kantonalnom agencijom za privlačenje investicija i privatizaciju, Agencijom za unapređenje stranih investicija u BiH (FIPA) i drugim relevantnim institucijama Finansijski poticaji direktnih stranih ulaganja
Indikator realizacije	Broj potencijalnih stranih ulagača koji su pripremili i dostavili kompletnu dokumentaciju u skladu sa javnim pozivom po ovom programu (min. 10 podnositelja prijave) Broj i iznos odobrenih finansijskih podrški stranim ulagačima prema odluci Vlade Kantona Sarajevo (minimalno 5 stranih ulagača) Broj zaključenih ugovora o dodjeli poticajnih sredstava sa pravnim licima koja imaju većinski udio stranih ulagača odabranih po ovom programu (minimalno 5 pravnih lica)
Izvori finansiranja	Budžet Kantona Sarajevo - Ministarstvo privrede Kantona Sarajevo

## II

U podtački 4.2.8 „Program: Refundiranje troškova tehnološke modernizacije, uvođenja/obnavljanja standarda kvaliteta i digitalizacije poslovanja“, pod naslovom: „Pravo i uslovi dodjele poticajnih sredstava“ iza riječi: „(vlasnik ili jedan zaposlenik)“, dodaju se riječi: „i koji su registrovani najkasnije do 31.12.2022. godine“.

## III


U podtački 4.2.10 „Program: Poticaj razvoja ženskog poduzetništva“, pod naslovom: „Pravo i uslovi dodjele poticajnih sredstava“ iza riječi: „(vlasnica ili jedan zaposlenik)“, dodaju se riječi: „i koji su registrovani najkasnije do 31.12.2022. godine“, a u odnosnoj tabeli ove podtačke, u koloni pored kolone: „Korisnici“, broj: „20“ zamjenjuje se sa brojem: „51“.

## IV

Godišnji plan u ostalom dijelu ostaje nepromijenjen.

Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),



3. Premijer Kantona Sarajevo,
4. Ministarstvo privrede Kantona Sarajevo.
5. Za objavu u „Službenim novinama Kantona Sarajevo“.
6. Evidencija.
7. A r h i v a.

